

Iroun Beretitenti  
Dieter F. Uchtdorf

Te Kauoman ni Kauntira  
n te Moan Beretitentii



# Ukoukora Kristo n te Kiritimati

Nakoia naake a tangiria n ataia bwa antai ngaira ae kaain Ana Ekaretia Iesu Kristo ibukiia Aika Itiaki ni Boong Aika Kaitira, I tangiria ni moanna ma (te ukeuke ibukin ataakina) ae kamataaki raoi man taeka aika teniua aikai: Ti ukoukora Kristo.

Ti ukoukoria n reirei mai Irouna. (Ti ukoukoria) n Ririmwiina. N riki n ai Arona.

Ni katoa bong rinanon te ririki, ti Ukoukoria. Ma riki n tain te ririki aei—te Kiritimati, ngke ti bukamarua bungiakin ara Tia Kamaiu ae tangiraki—a rikirake nanora nako Ina.

Ngkai mwakoron ara katauraoi ibukin bukamaruan te Kritimati, ti riai n iangoia bwa a kanga naake a maeka uoua tengaa te ririki n nako n tauraoi ni butimwaea rokon te Tia Kamaiu.

## Taan Kawakin Tiibu

Ti aki atai raoi aroia taan kawakin tiibu, ti tii ataiia bwa a “maeka n te tawaana, aika a tantani n te bong i rarikin aia nanai.”<sup>1</sup> Taan kawakin tiibu kaanga bon aomata aika bon arora, n aroia aomata aika mwaiti aika tamaroa aika aki toki n nako ni karekei maiuia.

A kona n tei ibukiia aomata ake, n te taina, a tia n aki rangin ni kekeiaki ni ukoukora te Kristo, ma a bitaki nanoia ngke a kaukaki taian karawa ao e katanoataaki Kristo nakoia.

Ao aikai ake, imwiin ongoraeakin bwanaaia ana taan uarongorongo karawa, a waekoa n nako Betereem n noo-ra te baere e roko.<sup>2</sup>

## Aomata Aika a Wanawana

Aomata aika a wanawana bon taan reirei ake a tia ni kamatebwiai rokon te Mesia, Natin te Atua. Rinanon aia kamatebwai, a kunea te kanikina are e kaota Bungiakina. Ngke a kinaia, a kitana mwengaia ao n nako Ierutarem, n titiraki, “E nga Teuare bungiaki ba aia Uea Iutaia?”<sup>3</sup>

Aia atatai iroun te Kristo e aki tiku n tii te reirei. N te tai are a noori kanikinaa ni Bungiakina, a waekoa n rimwiina. A waakina mwanangaia n ukoukora te Kristo.

A kona Aomata aika Wanawana n tei ibukiia naake a ukoukora te Kristo rinanon te kekeiaki ao te kamatebwai. Nanoia ae korakora nakon te koaua e kairia nakon kakae-an te Kristo ao n Taromauriia n Nakoana ae aia Uea ueea, aia Tia kamaiu aomata.<sup>4</sup>

## Timeon ao Nei Anna

A kona Timeon ao Nei Anna n tei ibukiia naake a ukoukora Kristo rinanon te Tamnei. Aomata aika moan te tamaroa aikai a bon rangin n taua te aro ao, rinanon te aki mamatam ao te tataro ao man kairan maiu ni kiritian ao

n ongotaeka, a tataninga ma te ingainga ni kan noora te bong are e na roko iai Natin te Atua.

Rinanon te kakaonimaki, te nanorinano, ao te onimaki, a tataninga ma te taotaonaki n nano ibukin rokon te Tia Kamaiu.

N tokina, a kaniwangaaki aia kakaonimaki ngke anganaki Maria ao Iotebwa te ataei are n te bong teuana e na katoka Iaona aia bure aomata.<sup>5</sup>

### Taan Onimaki ibuakoia Nibwaite ao Reimwanaite

Te karaki ae riinga te nano n aroia taan onimaki n te Aonaaba ae Boou n tarai kanikina ibukin bungiakin te Tia Kamaiu ae kuneaki inanon Ana Boki Moomon.

Ko uringnga bwa naake iai aia onimaki iroun Kristo a bwainingareaki ao ni bwainikirinaki. Aomata aika a mwaiti aia taneiai ao aia atatai ni bwain te aonaaba n te bong anne a bukinia taan onimaki ibukin teimatoaia ni boutokai keewe aika buakaka. Ni koauana, taan aki onimaki a rangin ni korakora aia bwainingare ngaia are a karika “te kiriwe ae korakora” n te aba (3 Nibwaai 1:7). A kaenaenaia naake a kakoaua bwa e na bungiaki te Tia Kamaiu.

Unia ao nanobuakaia e rikirake ni korakora n te aro are a tangiria n tiringia naake a kakoauaa te Tia Kamaiu. A bane n tauaki mwiin aron katokan mwakuri aikai n Ana Boki Moomon.<sup>6</sup>

Taan onimaki ake a maiu n te tai aei a kona n tei ibukiia naake a ukoukora te Kristo riki ngkana tabeman a ngare, a kaenaena, ao ni kamaraki nano. A ukoukora Kristo e ngae ngke tabeman a kataia n taekiniai ni kewe bwa aki itiaki, aki reirei, ao ni kai mwamwanaaki.

Ma unia tabeman aki kakerikaaka aia onimaki ni koaua taan onimaki man ukoukoran Kristo.

### Ti Ukoukora Kristo

Ni kabutaa te ririki, ao tao riki n tain te Kiritimati aei, e na kakabwaiaira ngkana ti titiraki riki te titiraki “I kanga n ukoukora Kristo?”

N tain te kaangaanga ni maiuna, te Uea ae Tawita e koroia, “O te Atua, bon Atua ngkoe; N na kakorakoraai n

ukoukori: e taka tamneiu n tangiriko, e batu ni bwarua rabwatau i bukim.”<sup>7</sup>

Tao te katei aei n ukoukora te Atua bon teuana bukina ae kabwarabwaraaki iai Tawita bwa te aomata ae ai aron nanon te Atua.<sup>8</sup>

N tain te Kiritimati aei ao ni kabuta te ririki, ti kona n ukoukoria ma nanora ao tamneira ara Tia Kamaiu ae tangiraki, te Uea n Raoi, Atuaia Iteraera ae Tabu. Ibukin te nano aei, nanona ae raka riki, e aki tii kabwarabwaraa bwa antai ngaira ngkai ngaira kaain Ana Ekaretia Iesu Kristo ni Boong Aika Kaitira ma ae raka riki bwa antai ngaira aika ana reirei Kristo.

### BWAII AIKA A NA TARAAKI

- 1.Ruka 2:8.
- 2.Taraa Ruka 2:15.
- 3.Taraa Mataio 2:1–2.
- 4.Taraa Mataio 2:11.
- 5.Taraa Ruka 2:22–38.
- 6.Taraa 3 Nibwaai 1.
- 7.Taian Areru 63:1.
- 8.Taraa Mwakuri 13:22.

---

### REIREI MAN TE RONGORONGO AEI

Ti na kanga n ukoukora raoi riki Kristo, n te kawai are e kaantningaia Beretitenti Uchtdorf? Ko na bae ni kaungaia naake ko reireiniia bwa a na titirakinii i bon irouia, “N na kangaa n ukoukora Kristo?” langoia ni kaoia bwa a na tibwauaia bwa a kanga ngaia n tatabemaniia n ukoukora Kristo n aia kamatebwai ni booki aika tabu n aia utu ni katoabong. Ko kona naba ni mataku n tamnein te Kiritimati n te Mormon.org ma naake ko reireiniia ao ni kaoia bwa a na iri n te ririki aei n ukoukora Kristo ao n iri Ana reirei.

### ATAEI

### Mataku ibukin Iesu

**A** mwaiti aomata aika mataku ao n tataningaa bungiakin Iesu. Ngkai ti mataku ao n tataninga manga Okina! Ti kona n tauraoi man reiakinan taean Iesu ao n Iria. Ko kanga n ira Iesu? Korea te itoi ao koroi am iango inanona.



# Tauraoi ni Katoka i aomi Rawawataia Raomi

*Tataromwaaka ni kamatebwiaia te bwai n reirei aei ao n ukoria bwa ko aonga n ataia bwa tera ae ko na tibwaia. E kanga ataakin ana kantaninga te Bootaki n Aine ni katauraoia natin te Atua aine ibukin kakabwaia n te maiu ae akea tokina?*

"**T**i katobibiaki irouia naake a kainnanoa ara ibuobuoki, ara kaunganano, ara boutoka, ara karanano, ara akoi," e taku Beretitenti Thomas S. Monson. "Ngaira bain te Uea ni buoka ana mwakuri iaon te aba, ma te tua ni beku ao ni buokia Natina. E katan iaora n tatabemanii-ra nako."<sup>1</sup>

Beretitenti Henry B. Eyring, Te Moan Kauntira n te Moan Beretitentii, e taku: "Te bitaki ae korakora e moanaki inanom ngke ko roko nakon te Ekaretia. Ko karaoa te berita, ao ko karekea te berita are e moanna ni bida aron kateim. . . .

". . . Ko berita bwa ko na buoka te Uea ni kabebetei rawawataia [tabeman] bwa a na mwengaraoi. Ko anganaki te mwaaka ni buokia ni kabebetei rawawataia aikanne ngke ko karekea te Tamnei ae Raoroi."<sup>2</sup>

"Ti tangiria ni kabongana otan te euangkerio n taraiā tabeman n aron te Tia Kamaiu—ma te nanoanga, onimaki, ao te tangira ae

Itiaki," e taku Jean B. Bingham, te Beretitenti ni Kabuta n te Bootaki n Aine. "E na roko te bong are ti na karekea bwaninin ataakin nanoia tabeman ao ti na kakaitau ni karekean te nanoanga are e a tia n anganira—n ai aron are ti anga ara iango ao ara taeka n tangira nakoia tabeman. . . .

"Katabeara ao tibwangara bon kamoamoakin bwaai aika nakoraoi irouia aomata *nako* ngkai ti kataia n riki n ai aron ara Tia Kamaiu."<sup>3</sup>

Ngkana ti katoka iaora rawawataia raora ao ni kawakin ara berita, ti kauka te kawai ibukin Iesu Kristo bwa e na kamaiuia tabeman. Unimwaane Jeffrey R. Holland man te Kooram n Abotoro n te Tengaun ma Uoman e iango: "Iangoan te kabanea ni kaangaanga kakoauakina n te Tauraki ao n te Mwakuri ni Kamaiu, I berita nakoimi E na aki mwaninga taekara ngkai. Ngke E taetae nakoia akana nanorinano, 'Bane mai nako Iu,' E nanonna ae

**Onimaki Utu Buoka**

E ataa te kawai n otinako ao E ataa te kawai ni waerake. E ataa bukina bwa E a tia n nakonako iai. E ataa te kawai bukina bwa *Ngaia* te kawai."<sup>4</sup>

## Rakan riki Booki aika Tabu

Mataio 25:40; I-Karatia 6:2;  
Motiae 2:17; 18:8–9

### BWAAI AIKA A NA TARAAKI

- Thomas S. Monson, "Beku ibukin te Uea ma te Tangira," *Riaona*, Beberuare. 2014, 4.
- Henry B. Eyring, "Te Tia Karaunano," *Riaona*, Meei 2015, 18.
- Jean B. Bingham, "N na Uota Ootan te Euangkerio nako Nanon Mweengau," *Riaona*, Nobembwa. 2016, 6, 8.
- Jeffrey R. Holland, "Broken Things to Mend," *Riaona*, Meei 2006, 71.

### *langoa Aio*

E kanga te ibuobuoki ni kabebetea rawawataia tabeman ao ni kawakin ara berita ni kauka te kawai ibukin Iesu Kristo ni kamaiuia naake a kainnanoia?